



Cressi cun plui lenghis

Il parussulin zâl e blu al da il benvignût par furlan ai gnûfs nassûts

Cressi cun plui lenghis al è un proget promovût de Agenzie Regionâl pe Lenghe Furlane adun cun cualchidune des Aziendis pe Assistance Sanitarie dal F-VJ, par promovi fra i gjenitôrs dai fruts a pene nassûts i vantaçs de educazion plurilengâl, cu la realizazion di materiâi informatîfs, un pacut cun diviers struments a supuart dal bilinguîsm, e di gadgets une vore ninins.

Ai neo gjenitôrs tal moment plui biel de nassite di un frut, il personâl sanitari dal repart di maternitât ur consegne, prime di tornâ a cjase, la valisute “Puarte a cjase il furlan”, che e à dentri materiâi cetant utii e gadgets simpatics e e je stade pensade e realizade par sensibilizâ e par invoîâ i gjenitôrs a inviâ un percors di educazion bi e plurilengâl. Te valisute si cjatin: une letare indreçade ai gjenitôrs, la vuide “Crescere con più lingue”, il depliant e il segnelibri informatîf “Figotiju par furlan”, il Dvd di “Pimpa par furlan”, un

librut ilustrât e di lei che al cambie daûr des novitâts editoriâls dal moment, un bavarin, un adesîf pe machine e un misuradôr di lungjece.



Il contignût de valisute ca di cualchi mêis al vignarà insiorât cu la gnove publicazion di “Benrivâts tal marimont” che si zonte te schirie di “prins libris”, za regalâts in chescj agns par promovi la lenghe furlane tant che “prime lenghe” pai frutins dentri di une suaze di educazion al plurilinguîsm.

“Benrivâts tal marimont” e je la storie de nassite e di chês esperience di amôr cussì grande che e compagne ducj i gjenitôrs cuant che al rive un frutin. Il protagonist, il parussulin, al è un ucielut piçul e taront, cu lis plumis coloradis di zâl, blu e vert. Al svole cjantuçant ator pai prâts fin che al cjate la sò compagne e cun jê al fâs un biel nît di lane e di plumis, in spiete dai picinins che a rivaran.

La publicazion e nas de colaborazion tra ARLeF e Futura Edizioni; i tescj cussì delicâts e simpatics a son di Lussia di Uanis e lis imagjinis legris e ben finidis a son di Giulia Spanghero.

Il librut, presentât in anteprime te suaze prestigjose de ultime edizion dal Festival vicino/lontano a Udin, al è za in distribuzion tes librariis.

Pagine par cure de ARLeF Agenzie Regionâl pe Lenghe Furlane

ARLeF AGJENZIE
REGJONÂL
PE LENGHE
FURLANE